

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : MASA PERTANYAAN MENTERI (MQT)

DARIPADA : YB PUAN WONG SHU QI [KLUANG]

TARIKH : 10 NOVEMBER 2020 (SELASA)

SOALAN

Minta **PERDANA MENTERI** menyatakan rasional pelaksanaan Perintah Kawalan Pergerakan Bersyarat (PKPB) di tujuh buah negeri yang bermula pada 9 November 2020.

JAWAPAN

**YB DATUK SERI MOHD REDZUAN BIN MD. YUSOF,
MENTERI DI JABATAN PERDANA MENTERI (TUGAS-TUGAS KHAS)**

Tuan Yang Dipertua,

1. Sepertimana yang kita semua sedia maklum, Kerajaan telah membuat keputusan untuk melaksanakan Perintah Kawalan Pergerakan Bersyarat (PKPB) di semua negeri di Semenanjung Malaysia kecuali Perlis, Kelantan dan Pahang selama empat minggu bermula **9 November sehingga 6 Disember 2020**. Kerajaan mengambil keputusan ini berikutan peningkatan kes COVID-19 di setiap negeri tersebut dan terdapat keperluan untuk kita menggunakan pendekatan yang lebih tegas dan berani sebelum keadaan bertambah buruk.

2. Keputusan Kerajaan ini juga dibuat susulan daripada laporan kes pada **6 November 2020** oleh Kementerian Kesihatan Malaysia (KKM) di mana Malaysia telah mencatatkan jumlah tertinggi kes COVID-19 harian iaitu sebanyak **1,755 kes**. Berdasarkan situasai ini, KKM segera melaksanakan penilaian risiko dan mendapati bahawa terdapat

NO. SOALAN : 1

peningkatan ketara bilangan kes positif COVID-19 dan kadar kebolehhajatan di negeri–negeri tersebut.

3. Atas sebab ini, Kerajaan membuat keputusan untuk melaksanakan PKPB dalam tempoh 4 minggu (28 hari) dan PKP Diperketatkan (PKPD) bagi lokaliti yang dikenalpasti mempunyai kadar penularan yang tinggi dan bersasar bagi mengekang penularan wabak ini. Susulan daripada keputusan ini, prosedur operasi standard (SOP) yang diwujudkan bagi mengatasi penularan di kawasan PKPB akan diperketatkan terutamanya bagi aktiviti sosial dan termasuk juga di kawasan-kawasan terkawal seperti penjara, lokap atau Pusat Tahanan Sementara.

4. Dengan pelaksanaan SOP untuk PKPB ini, orang ramai perlu mendapatkan kebenaran untuk melakukan rentas negeri. Sekatan rentas negeri bagi semua tujuan selain kegiatan ekonomi dan bekerja dilaksanakan di seluruh negara dengan kawalan sekatan jalanraya di semua sempadan negeri bermula 12.01 tengah malam 9 November 2020. Sekatan tegas perlu dilaksanakan terhadap sebarang aktiviti sosial oleh pihak Polis DiRaja Malaysia (PDRM) dan Angkatan Tentera Malaysia (ATM).

5. PKPB yang dilaksanakan ini merupakan satu langkah untuk meneruskan kuatkuasa Akta Pencegahan Dan Pengawalan Penyakit Berjangkit 1988 [Akta 342] yang memayungi SOP-SOP yang telah dikeluarkan. Dengan penerusan penggunaan Akta 342, penguatkuasaan ke atas pematuhan SOP-SOP dapat dilaksanakan oleh agensi-agensi yang telah diberi kuasa di bawah Akta ini untuk memastikan pematuhan ke atas SOP selain mendidik masyarakat untuk membudayakan normal baharu kehidupan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : MASA PERTANYAAN MENTERI (MQT)

**DARIPADA : TUAN KELVIN YII LEE WUEN
[BANDAR KUCHING]**

TARIKH : 10 NOVEMBER 2020 (SELASA)

SOALAN

Minta **MENTERI KANAN PENDIDIKAN** untuk menyatakan rasional untuk menutup sekolah di seluruh negara termasuk kawasan hijau COVID-19 dan menanggungkan peperiksaan awam dan rancangan kerajaan untuk membantu pelajar yang tiada kemudahan internet dan komputer riba terutamanya di kawasan pedalaman

JAWAPAN

Tuan Yang di-Pertua,

Pada 7 November 2020, Kerajaan telah mengumumkan pelaksanaan Perintah Kawalan Pergerakan Bersyarat (PKPB) melibatkan seluruh negeri di Semenanjung Malaysia kecuali negeri Kelantan, Pahang dan Perlis. Tempoh PKPB ini adalah selama empat minggu bermula 9 November sehingga 6 Disember 2020. Manakala PKPB di Sabah, Selangor serta Wilayah Persekutuan Kuala Lumpur, Putrajaya dan Labuan turut dilanjutkan sehingga 6 Disember 2020.

Menurut Prosedur Standard Operasi (SOP) PKPB, semua institusi pendidikan, termasuk sekolah hendaklah ditutup sepanjang tempoh tersebut. Berdasarkan pengumuman PKPB, secara keseluruhan, penutupan sekolah di negeri-negeri terlibat meliputi 74 peratus daripada jumlah keseluruhan sekolah di bawah Kementerian Pendidikan Malaysia (KPM).

Berdasarkan Takwim Penggal dan Cuti Persekolahan Tahun 2020, hari akhir persekolahan tahun ini adalah pada 17 Disember 2020 bagi negeri Kumpulan A dan 18 Disember 2020 bagi negeri Kumpulan B. Ini bermakna, selepas PKPB tamat, murid di negeri kumpulan A dan negeri kumpulan B masing-masing mempunyai baki 9 dan 10 hari persekolahan sahaja. Memandangkan baki tempoh persekolahan yang singkat selepas PKPB tamat serta mengambil kira saranan Kementerian Kesihatan Malaysia (KKM) dan Majlis Keselamatan Negara (MKN) dalam menangani penularan wabak COVID-19, KPM berpendirian bahawa murid, termasuklah murid di sekolah berasrama, perlu terus kekal berada di rumah.

Oleh yang demikian, KPM mengambil keputusan untuk melanjutkan penutupan sekolah di negeri yang terlibat dengan PKPB sehingga 17 Disember 2020 bagi negeri Kumpulan A dan 18 Disember 2020 bagi negeri Kumpulan B. KPM juga membuat keputusan untuk menutup baki 26 peratus sekolah di empat buah negeri yang tidak terlibat dengan pelaksanaan PKPB. Keputusan ini diambil berdasarkan analisis data terhadap kes positif, kontak rapat dan kuarantin dalam kalangan murid, guru serta warga sekolah yang semakin meningkat semasa gelombang ketiga pandemik COVID-19 di negeri-negeri tersebut.

NO. SOALAN : 2

Selain daripada itu, data KPM menunjukkan kehadiran murid ke sekolah akan terjejas apabila terdapat kes positif di sesuatu kawasan walaupun ianya terletak di negeri-negeri yang secara keseluruhannya tidak mencatatkan kes COVID-19 yang tinggi. Ketidakhadiran murid ini adalah disebabkan oleh kebimbangan ibu bapa terhadap keselamatan anak mereka jika hadir ke sekolah.

Untuk makluman Ahli Yang Berhormat, penutupan sekolah di empat negeri berkenaan melibatkan seramai 1,087,803 murid, 99,491 guru dan 20,438 anggota kumpulan pelaksana. Ini merupakan satu jumlah yang signifikan dalam membantu KKM dan petugas barisan hadapan membendung penularan COVID-19.

Selain daripada itu, KPM berpandangan bahawa usaha membendung penularan wabak ini amat penting dalam memastikan sesi persekolahan untuk tahun 2021 dapat dimulakan dalam keadaan selamat seperti mana yang dijadualkan. Ini juga penting bagi memastikan peperiksaan awam yang telah ditangguhkan ke bulan Februari 2021 dapat dilaksanakan dengan lancar dan selamat.

Tuan Yang Dipertua,

KPM telah membuat keputusan untuk meminda tarikh peperiksaan awam dengan mengambil kira pengajaran dan pembelajaran (PdP) yang terjejas sejak PKP dilaksanakan pada bulan Mac hingga Jun 2020. Walaupun sekolah telah dibuka semula secara berperingkat bermula 24 Jun 2020, terdapat banyak sekolah di beberapa negeri yang terpaksa ditutup semula disebabkan oleh penguatkuasaan PKPB. Ada negeri-negeri yang telah menutup sekolah selama lebih empat minggu. Peningkatan ketara jumlah kes positif COVID-19 pada gelombang ketiga dan pelaksanaan PKPB yang terkini juga telah memberi kesan kepada persiapan murid untuk menghadapi peperiksaan.

Dengan pindaan tarikh peperiksaan awam, calon peperiksaan akan mempunyai masa lebih panjang untuk membuat persediaan rapi bagi menghadapi peperiksaan. Selain daripada itu, ianya juga memberi lebih masa kepada mereka untuk mengikuti pembelajaran secara bersemuka apabila sekolah dibuka semula. Penangguhan peperiksaan ini juga membolehkan KPM lebih bersedia mengatur pelbagai aspek logistik

berkaitan pelaksanaan peperiksaan khususnya bagi negeri yang terjejas teruk dengan penularan COVID-19.

Tuan Yang Dipertua,

KPM sentiasa berusaha untuk memastikan semua murid mendapat akses pembelajaran secara saksama, tanpa mengira keberadaan atau latar belakang sosioekonomi mereka. Untuk murid yang tidak mempunyai akses kepada capaian internet atau peranti yang sesuai, pembelajaran dilaksanakan melalui siaran TV Pendidikan di saluran TV Okey dan Tutor TV Astro.

Di samping itu, guru juga melaksanakan pengajaran dan pembelajaran melalui serahan bahan pembelajaran kepada murid, terutamanya bagi murid yang tinggal di kawasan luar bandar dan pedalaman. Serahan bahan ini dibuat melalui pelbagai kaedah seperti perkhidmatan pos, bantuan penghantaran oleh Persatuan Ibu Bapa dan Guru dan kaunter pandu lalu di sekolah.

KPM sedang di peringkat akhir merangka strategi pelaksanaan yang komprehensif dalam memperkasa pendidikan digital negara. Ini termasuklah mengambilkira keperluan pemilikan peranti oleh murid dan juga akses internet di sekolah di seluruh negara. Perkara ini adalah antara butiran yang dinyatakan dalam Belanjawan 2021 yang telah dibentangkan pada 6 November 2020.

Sekian, terima kasih.

PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS

PERTANYAAN : WAKTU PERTANYAAN MENTERI (MQT)

**DARIPADA : DATO' HAJI MOHD FASIAH BIN HAJI MOHD
FAKEH [SABAK BERNAM]**

TARIKH : 10 NOVEMBER 2020 (SELASA)

SOALAN

DATO' HAJI MOHD FASIAH BIN HAJI MOHD FAKEH [SABAK BERNAM] minta **MENTERI KESIHATAN** menyatakan bilangan kluster yang menyebarkan pandemik COVID-19 di negara ini dan nyatakan bilangan yang telah dikawal sepenuhnya dan bilangan kluster yang masih aktif terkini dan setakat manakah kluster-kluster ini telah memberi kesan kepada penyebaran COVID-19 di negara ini.

JAWAPAN

Tuan Yang di-Pertua,

1. Sehingga **9 November 2020**, jumlah kes positif COVID-19 di Malaysia adalah sebanyak **39,357 kes**. Jumlah kumulatif kes kematian COVID-19 adalah sebanyak **286 kes**. Negeri yang melaporkan kes positif yang tertinggi adalah Sabah dengan kes sebanyak **20,234 kes** dengan **149 kes kematian**.

2. Sehingga **9 November 2020**, jumlah kluster yang dipantau oleh Kementerian Kesihatan Malaysia (KKM) adalah sebanyak **276 kluster**. Daripada jumlah tersebut, kluster aktif yang masih dipantau oleh KKM adalah sebanyak **151 kluster** dengan jumlah individu yang disaring adalah seramai **129,227 orang**. Sebanyak **125 kluster** telah tamat dengan jumlah individu yang disaring adalah seramai **194,527 orang**.

3. Daripada **151 kluster aktif** yang dilaporkan, kluster yang melaporkan kluster yang terbanyak adalah Kluster Kediaman dengan

SOALAN NO : 3

64 kluster; diikuti dengan Kluster Tempat Kerja dengan 63 kluster; Kluster Pusat Tahanan dengan 9 kluster; Kluster Kumpulan Berisiko (anggota kesihatan dan warga emas) dengan 9 kluster; Kluster Keagamaan (selain kluster Tabligh SP) dengan 3 kluster dan Kluster Import dengan 3 kluster.

4. Kluster terbesar yang dilaporkan kepada *Crisis Preparedness and Response Centre* (CPRC) Kebangsaan KKM adalah Kluster Tabligh Sri Petaling. Kluster tersebut melibatkan sebanyak **3,375 kes** dan seramai **42,023 orang** disaring. Kes pertama bagi kluster itu adalah pada **11 Mac 2020** dan kluster diisytihar tamat pada **8 Julai 2020**. Kes-kes indeks merupakan individu-individu yang menghadiri perhimpunan keagamaan di Masjid Sri Petaling. Punca jangkitan adalah dipercayai dari jangkitan import dari Indonesia. Berdasarkan siasatan yang telah dijalankan, kes indeks dan kontak rapat dikenalpasti serta ujian pengesanan COVID-19 telah dijalankan. Kesemua mereka dikesan positif COVID-19 dan siasatan kontak dilaksanakan.

5. Mengambil iktibar dari kluster ini, KKM berharap agar nasihat-nasihat yang ditekankan oleh KKM diamalkan seperti:

- i. Elakkan 3S / 3C: iaitu elakkan kawasan yang sesak (*Crowded place*), elakkan kawasan yang sempit (*Confined space*) dan elak sembang atau bertutur dengan jarak yang dekat (*Close conversation*).
- ii. Amalkan 3W: iaitu kerap mencuci tangan dengan air dan sabun (*Wash*), memakai alat pelitup muka (*facemask*) di tempat awam yang telah diwajibkan oleh pihak Majlis Keselamatan Negara (MKN) mulai 1 Ogos 2020 atau jika bergejala (*Wear*), dan (*Warn*) iaitu amaran dari KKM yang lebih berkonsep peringatan seperti:
 - Elakkan bersalaman / bersentuhan;
 - Amalkan etika batuk dan bersin;
 - Dapatkan rawatan segera jika bergejala;
 - Duduk di rumah dan elakkan kunjung-mengunjung; dan
 - Lakukan aktiviti disinfeksi dan pembersihan di kawasan yang kerap disentuh.

SOALAN NO : 3

iii. Patuhlah kepada S.O.P sebagai normal baharu iaitu:

- S: Syarat-syarat seperti yang ditetapkan di bawah Perintah Kawalan Pergerakan Pemulihan (PKPP);
- O: Orang yang berisiko tinggi seperti kanak-kanak, bayi, warga emas dan orang kurang upaya (OKU) perlu dilindungi, individu tidak sihat dan bergejala dikehendaki segera menjalani pemeriksaan kesihatan;
- P: Penjarakan fizikal (*physical distancing*) diamalkan pada setiap masa iaitu sekurang-kurangnya 1 meter.

6. KKM akan terus memantau perkembangan kluster-kluster dan juga kejadian jangkitan di dalam negara dan juga luar negara.

Sekian, terima kasih.